

S'ARVORE 'E SU TEMPUS

S'arvor'anticu 'e sa vida
hat raichinas de vulcanu
e fozas d'eternidade.

Isprugande sas chimmas sicas,
donna tantu che 'urat
unu vruttu a su sole
po l'offerrer a puzones,
cando drommit, isterriu
in sos campos de su longu istiu.

Custu truncu
milli 'ortas brusau
milli 'ortas foziu,
hat miuddu de vida,
e lottat a sos ventos furibundos.

A bortas sos fiores
los istrazzat sa manu isconnotta
e-i su pe' insensibile los caticat,
in su ludu 'e paule.

A bortas, sa luna,
'nd'hat dolu e lu lusingat
chin sas manos de luche
cando in nottes serenas
s'isterret in campos de 'erva
e sonniat in capitta 'e sos rios
chi cantan a su mundu
sa canzone 'e sa Naschida.

Ma cust'arvore 'e su Tempus,
milli 'ortas brusau,
milli 'ortas foziu,
galu no' hat donau
su vruttu sonniau
chin colore de pache,
chin musicas de amore.

Solu cando
s'arvore de sa vida,
hat a custoire in ramos suos
sos nidos de coros;

solu tando, sas froeddas noitolas
han'artiare che brazzos a chelu
po si prenare s'anima
de sa luche illacanaa de s'Infiniu.

L'ALBERO DEL TEMPO

L'albero della vita / ha radici di vulcano / e foglie d'eternità.

*Ogni tanto rapisce / qualche frutto al Sole / da offrire agli uccelli, / quando l'Astro
sonnecchia, / adagiato sui campi delle lunghe estati.*

*Questo tronco / mille volte bruciato, / mille volte fogliato, / ha il midollo temprato
/ alla lotta dei venti furibondi.*

*A volte i suoi fiori, / mani insensibili li strappano / e calpestano sulla palude /
dell'indifferenza.*

*Qualche volta, la Luna / ha pietà e lo accarezza / con mani di luce quando, nelle
notti serene, / s'adagia quieta sui campi d'erba / e sogna al guanciale dei fiumi /
che cantano al Mondo / la canzone della Genitura.*

*Ma quest'albero del Tempo, / mille volte bruciato, / mille volte fogliato, / ancora
non ha reso / il frutto sognato / con colori di pace, / con musiche d'amore.*

*Solo quando / l'Albero della Vita, / accoglierà nel suo seno / nidi di cuori: solo
allora, / le novelle fronde saliranno / ad abbracciare il Cielo / e colmarsi l'anima
/ dell'abbagliante luce dell'Infinito.*